

雕

菰

集

離菰集卷十一

江都焦循著

釋月

歲戊午與高郵沈方鍾鈞晤於金陵之旅舍方鍾語余
日月之有魄也虛與實與有形而暗與抑無形而空與
六月之下弦歲星交於月星貫弧背自兩角間出含有
形而暗也則星不得見矣星故上於月今月之魄不可
以揜星意者其虛而無形者邪余時無以應歸而思之
白虎通德論云日之爲言實也常滿有節月之爲言闕
也有滿有闕也所以有闕何歸功於日也其在說文篆

而闕制字不象其盈而必象其闕者豈非以形之本闕乎哉蓋日之形如球月之形如釜常受日之光以爲半圓故其弧背常向於日陰承陽之義也且日乘於天月生於地月猶水也水隨日而潮月隨日而滿陰主凝得陽則起而充焉弧背所以向日日之氣充之而弧也然不必星之交月而知之矣魄而有形則當其弦也必半明而半黑矣今其半不著其黑也弦之外蒼蒼者天也初生明時有圓影一規漸至上弦轉無此影尤可見矣聖人知之故制月之字而象其闕云爾

釋軌

記云六尺有六寸之輪軹崇三尺有三寸加軫與轆焉
四尺也此度之見於經文者甚明曰四尺而不曰軫與
轆七寸則不得定軫與轆爲七寸可見六尺六寸三尺
三寸皆言其奇零牙圍轂長之數皆比例至於微妙則
此四尺之數必非統總約略之數又可見則於此因軫
轆之圍以求其徑因其徑以求所謂四尺者安在則軌
之所在可以意推矣竊以軫圍一尺一寸方徑二寸七
分五釐當免圍一尺五寸二分三釐六豪方徑三寸八
分零九豪轆之厚與此平則轆亦厚三寸八分零九豪

矣軫轆合厚六寸五分五釐九豪又度軾崇三尺三寸
由軾心至軸之上又高於軾者半軸軸圍一尺三寸二
分圓徑四寸二分釐二五六半之爲二寸一分零零七
八以半軸合軾轆共八寸六分五九七八則較四尺之
數又多以七寸減軾轆半軸之合數羨一寸六分五釐
九七八由此推之則輿底板必上與軾平軾下當飛出
輿底板一寸六分五九七八也轆帖於輿底板與輿中
互宜亦一寸六分五九七八也於軾減一寸六分五九
七八羨一寸一分零九七八於轆減一寸六分五九七
八羨二寸二分五釐零七八合軾全數轆羨數及半軸

之數成七寸與軹爲四尺也軹宜與轆平而礙於前後軫之飛出則必於飛出礙軹之處刻爲方缺以限軹所謂軹者蓋卽此車之名多矣而祭獨於軹與軹蓋聖人以無形之地爲神軹居轂中而軹無形軹居軾中而軹無形此所以祭也

釋闕

曲禮大夫士出入君門由闕右不踐闕正義云出入不得踐履門限所以爾者一則自高二則不淨並爲不敬此最可疑無論公門之尊卽士庶之家出入者豈有踐於闕上之理公門高其闕亦必高雖極不敬何至登於

其上以自高而不絜耶顧命大輅在賓階面綴輅在阼
階面考工記路門不容乘車之五个應門二轍參个樂
師注云王如有車出之事登車於大寢西階之前反降
於阼階之前然則門有車行車行則闕不得置今官署
門限每日必徹去以通人行何致不俟其徹去而踐履
之余嘗思其故玉藻賓人不中門不履闕鄭氏以不履
闕屬上賓入不中門一氣貫下而注之云辟尊者所從
也則不獨中門爲尊者所從而此闕亦尊者所從蓋闕
與門限有別掩兩扉則用門限投於兩棖而不設梲簳
門則徹去門限而設兩梲設兩梲則門分爲三其兩梲

之闕爲中門。臬東、臬西爲人臣出入所由。則不設闕。兩
臬間則設闕。蓋兩臬卽連於闕上。惟不入中門。故不履
闕。此中門之闕。惟君出入履之。亦惟鄰國之君來出入
履之。不獨本國之臣不踐此闕。卽來聘之客亦不敢履
此闕。故下申言云。公事自闌西。私事自闌東。闌東闌西
無闕。則由之兩闌之間。有闕。則不敢踐。所爲辟尊者所
從也。士冠禮及特牲饋食禮皆云。席于門中。闌西闕外。
門中闌西卽兩闌間之東也。此處有闕。則闕外無闕。聘
禮賓者出立於門中。以相拜。記云。賓者立於闕外。以相
拜。亦闕在門中之證。闌西二字緊屬門中。謂爲門中之

闌西非門西之闌西也於是曲禮言大夫士出入君門由闌右不踐闕可得而明不踐闕所以由闌右由闌右所以不踐闕闌右卽闌西也由闌右則不踐闕由門中之闌西則必踐闕此注明云辟尊者所從而孔氏不知門有兩闌以爲自高不淨失之矣

釋仿

王制祭用數之仿說文作𠄎仿卽𠄎也易筮以四揲之餘爲𠄎此制國用之法三年餘一則一年餘三分之一而一年所用爲四分之三合之爲四分是每年所入以四分之猶易筮之以四揲也於此四分之外先取一分

以爲祭用如先有扚二十一而後知得少陽四七之數
先有扚十三而後知得老陽四九之數故借揲筮之扚
以名之也設如五十里之國爲田萬二千五百畝畝一
鍾鍾六斛四斗共八萬斛以四四數之每分二萬以二
萬爲所蓄以六萬爲一歲經用則無扚惟先扚一分以
爲祭之用譬如先取一萬斛以爲扚餘七萬斛四分之
每分一萬七千五百斛卽以此一萬七千五百斛爲所
蓄而以五萬二千五百斛爲一歲經用玩下云祭豐年
不奢凶年不儉則祭之用有一定之數故先存此數而
後四分之其每年經用則量入爲出因豐耗爲奢儉也

喪三年不祭卽以每年祭之用合以爲喪之用故喪用三年之仿聖人重祭於一仿字見之而曰暴曰濫不奢不儉與上文量入爲出互相發明見量入爲出用諸一年經費不用諸喪祭喪祭之用不因豐凶爲奢儉者也鄭康成謂仿爲用其什一則在一歲經用之內歲有豐耗則祭不能無奢儉矣方慤禮記解義以數之仿爲一年所用四分之一四分之一卽爲所蓄以備凶荒每年有祭而所蓄僅足充祭而三年必餘一年者何在乎惟仿在四分之外雖極歉之年必先存此仿他用有不足以三年所蓄者補之

釋鬯

春官鬯人凡王弔臨共介鬯鄭司農云鬯香草王行弔
喪被之疏引王度記天子以鬯諸侯以薰大夫以蘭士
以蕭庶人以艾薰蘭蕭艾皆香草鬯與之類故詩秬鬯
一卣毛傳亦云香草也築煮合而鬱之曰鬯鬱者鬱積
之謂也肆師祭祀之日及果築鬯鄭司農云築香草煮
以爲鬯鬱人凡祭祀賓客之裸事和鬱鬯以實彝而陳
之鄭司農云鬱草名十葉爲貫百二十貫爲築以煮之
鑊中停於祭前鬱爲草若蘭此以鬱爲草名築煮之則
名鬯與毛公合而鬱之之說異鄭康成則謂鬱金香草

宜和鬯又云鬯釀秬爲酒芬香條暢於上下也其箋詩也則云秬鬯黑黍酒也是以鬱爲草名鬯爲酒名與毛傳異與鄭司農亦異試爲通考之雜記云暢白以柶杵以梧暢卽鬯顏師古注漢書云鬯古暢字是也白杵築器冠以鬯字則鬯出於築非酒名說苑云鬯百草之本上暢於天下暢於地無所不暢故天子以鬯爲贄春秋繁露云天子用暢積美陽芬香以通之天暢亦取百香之心獨末之合之爲一而達其臭味水經注引應劭風俗記云鬱芬草也百草之華煮以合釀黑黍然則鬱鬯皆指百草之華以其氣暢達則稱之爲鬯以其鬱積而

合成則稱之爲鬱故以鬱爲香草可也以鬱爲鬱積亦可也以鬯爲香草可也以鬯爲暢達亦可也鬯人大喪共鬯以沃尸王齊共矩鬯以給浴斷無以酒浴者弔臨被介鬯酒則何以言被司尊彝凡六尊六彝之酌鬱齊獻酌注引郊特牲云汁獻浼於醲酒彼注云謂沛和鬯以醲酒也獻當讀莎齊語也秬鬯者中有煮鬱和以益齊摩莎沛之出其香汁因謂之汁莎鬱人亦言和鬱鬯以實彝是鬱鬯必俟和於酒而鬱鬯非酒也蓋築香草釀成之謂之鬱鬯所以釀之用黍故又曰秬鬯釀之爲鬯非釀之爲酒也今人擣諸香草之屑合之稻米搏

以爲佩宋陳敬集沈立洪芻等十一家爲香譜四卷卽
詳其事俗稱之爲香料卽鬯之遺製也用於裸則和酸
酒而沛之用於浴則和水以供之用於弔喪則不和而
被之被之卽佩之也鬯人汎掌諸鬯鬱人主灌酌職有
不同故名有各異以鬯爲香草者從其本也

廣陵考一

春秋哀公九年秋吳城邳句溝通江淮杜預集解云於
邳江築城穿溝東北通射陽湖西北至末口入淮通糧
道也今廣陵邳江是杜預時中瀆故道未改所述如是
胡渭禹貢錐指本水經注作溝通江淮圖以水經考之

胡所圖未是也今詳析之水經注云中瀆水首受江於
廣陵郡之江都縣舊江水道也昔吳將伐齊北霸中國
自廣陵城東南築邗城城下掘深溝謂之韓江亦曰邗
溟溝自江東北通射陽湖地理志所謂渠水也西北至
末口入淮此一段言吳之邗溝也注云自永和中江都
水斷其水上承歐陽引江入埭六十里至廣陵城中瀆
水自廣陵北出武廣湖東陸陽湖西二湖東西相直五
里水出其間下注樊梁湖此一段謂永和中所改之邗
溝道也注又云舊道東北出至博芝射陽二湖西北出
夾邪乃至山陽矣此所云舊道卽永和前吳所溝通之

故道漢志云江都縣渠水首受江北至射陽入湖蓋博
芝與射陽南北相連中瀆水自廣陵東南直北入博芝
射陽二湖不注樊梁也注又云至永和中患湖道多風
陳敏因穿樊梁湖北口下注津湖逕渡渡十二里方達
北口直至夾邪此又申言永和中所改之道由樊梁湖
注津湖至夾邪不復由博芝射陽矣蓋博芝射陽在東
樊梁在西既至樊梁不得又繞於博芝也胡氏作圖以
邗水入樊湖又由樊湖入博芝湖竟合吳之舊道與永
和改道爲一於酈氏之文未細審矣謝靈運撰征賦云
爰薄方輿乃屆歐陽入夫江都之域次乎廣陵之鄉此

由歐陽而江都由江都而廣陵陳太建五年北伐徐敬
成爲都督乘金翅自歐陽引埭上泝江由廣陵自樊梁
湖下淮此由廣陵而樊梁由樊梁而淮與水經注所敘
永和水道合

廣陵考二

史記六國表楚懷王十年城廣陵廣陵之名始見於此
陳涉世家陵人秦嘉漢書陳勝傳作凌人秦嘉地理志
泗水國有凌縣水經注淮水篇言凌水出凌縣東流逕
其縣故城東而東南流注於淮則凌縣自在淮水之北
後漢雖屬廣陵郡而嘉實非淮以南之人臣瓚謂嘉爲

廣陵人或以郡稱之然指稱陳勝傳所云則當是誤陵
人爲廣陵人耳水經注言廣陵郡在楚漢間爲東陽郡
文穎以嘉爲東陽郡人蓋亦以凌縣嘗隸廣陵郡在楚
漢間廣陵旣稱東陽凌卽宜隸東陽也乃東陽雖卽廣
陵凌縣在楚漢時未必屬之且史記稱鉅人董緹符離
人朱雞石取慮人鄭布徐人丁疾之類皆以縣不以郡
則東陽甯君自爲東陽縣之甯君秦嘉以陳涉世家稱
陵人故於此略之而陵人正與鉅人徐人等一例必不
緣郡名而稱廣陵東陽也乃高帝紀集解引陳涉世家
亦云秦嘉廣陵人而於陳涉世家陵人秦嘉則引地理

志泗水國凌縣漢書注引臣瓚說則作陵人秦嘉無廣
字嘉固凌縣人不得與廣陵混矣宋書州郡志有廣陵
令亦凌令之譌

廣陵考三

漢書地理志廣陵國四縣廣陵江都高郵平安臨淮郡
所屬有射陽鹽漬東陽海陵興堂邑後漢則皆隸於廣
陵郡其泗水國之凌東海郡之海曲即海西亦隸之而海

陵則省杜佑通典以東陽爲卽盱眙以射陽爲卽山陽
杜之說非也漢書地理志於臨淮之海陵注明有江海
會祠則其地之瀕江瀕海可知也枚乘傳乘爲吳王濞

郎中上書諫漚云轉粟西鄉陸行不絕水行滿河不如
海陵之倉臣瓚云海陵縣名也有吳太倉後漢旣省海
陵而東陽下卽注明有長洲澤吳王濞太倉在此則東
陽海陵本屬相連旣併海陵於東陽而海陵之倉遂在
東陽之地互核前後兩志瞭然如繪也劉昭續漢志注
補云東陽縣多麋博物記十千爲羣掘食草根其處成
泥名曰麋畷太平寰宇記載麋塹於海陵麋塹卽麋畷
亦以東陽卽海陵矣水經注謂廣陵城在楚漢之間爲
東陽郡高祖六年爲荊國十一年爲吳城卽吳王濞所
築是則以廣陵先爲東陽郡後罷郡但存東陽縣耳盱

眳爲義帝所都楚漢間自有其地前漢爲都尉治所後漢分東陽屬廣陵而眳眳自屬下邳何得合爲一哉項羽本紀言東陽少年殺其令相立陳嬰爲長東陽有令長爲縣無疑廣陵人召平爲陳王徇廣陵陳嬰爲東陽令史儼然兩地蓋東陽郡自治廣陵廣陵爲附郡之縣東陽縣自在廣陵之東東陽郡不治東陽也漢廣陵國包於臨淮郡之中後漢并爲廣陵郡則自安平江都堂邑以東直至於海皆爲廣陵郡地晉武帝分立臨淮郡則以東陽高郵隸之三國志陳矯傳云廣陵東陽人晉書陳騫傳云臨淮東陽人騫爲矯子幼隨父仕魏魏拜

使持節都督淮北諸軍事進爵廣陵侯時廣陵在淮以
南騫持節於淮北已不復以廣陵爲家晉書稱臨淮東
陽第因太康所分設而稱之耳後漢省海陵並入東陽
晉則廣陵郡有海陽注云有江海會祠與漢書海陵注
同知海陽卽海陵也晉省安平而有海陽荀羨傳云東
陽之石鼃隋書地理志言石鼃入於安平然則晉以後
漢之東陽爲海陽卽以後漢之安平爲東陽東陽乃由
東南漸移至西北而晉之東陽卽殊乎漢之東陽其後
立盱眙郡於是東陽又廢蓋其地并入盱眙郡中爲陽
城直瀆之境杜佑以東陽卽盱眙此誤晉以後之東陽

爲漢之東陽也宋書州郡志臨淮太守領射陽東陽此屬南徐州乃僑立於江南者而江北遂無此二縣隋志梁於永福縣置涇城東陽二郡陳并二郡爲沛郡周改沛郡爲石梁郡改沛縣爲石梁縣省橫山縣入焉開皇初郡廢大業初改縣曰永福唐志武德七年析六合置石梁縣以六合石梁二縣置方州蓋永福在今天長儀徵六合之間梁之東陽立於此太平寰宇記東陽故城在盱眙縣東七十五里以爲不知何時所立以地準之盱眙東之東陽故城乃晉之東陽非漢縣亦非梁縣也

廣陵考四

水經注以中瀆水自廣陵出山陽白馬湖逕山陽城西
卽射陽縣之故城也漢高祖六年封楚左令尹項繩爲
侯國世祖建武十五年封子荆爲山陽公治此通典以
射陽卽山陽蓋本諸此按章懷太子注臧洪列傳以射
陽故城在安宜縣東安宜城在今寶應縣西南劉昭郡
國志注補明言射陽有梁湖博支湖梁湖卽樊梁湖在
今高郵城西北博支卽博芝在寶應城東南九十里二
湖屬之射陽則射陽地不獨當今之寶應而且南溫高
郵矣水經言淮水東過淮陰縣北中瀆水出白馬湖東
北注之今之淮安山陽乃漢之淮陰縣地而鹽瀆平安

射陽則分得今鹽城山陽寶應縣地大約射陽在中瀆水之東平安在中瀆水之西北抵於淮南及梁湖安宜在今寶應縣之西南則在白馬湖之西蓋唐之安宜卽漢之平安其地西入今之天長而今之興化則漢之高郵海陵地今之靖江通州如皋則漢之東陽海陵地故以今之揚州準漢之廣陵郡不得謂平安卽今寶應亦不得謂射陽非今之寶應也不得謂東陽非今之泰州亦不得謂海陵卽今之泰州也若淮安之有山陽縣始於東晉漢之山陽郡屬兗州在今金鄉魚臺之間東漢封荆爲山陽公卽兗州之山陽郡酈氏以射陽故城當

之東漢之初射陽名未改何得以山陽公而治此酈氏
生於北方南方水地往往淆誤此其一也

廣陵考五

漢書百官公卿表云諸侯王高帝初置掌治其國內史
治國民中尉掌武職丞相統衆官景帝中五年令諸侯
王不得復治國天子爲置吏改丞相曰相成帝綏和元
年省內史更令相治民如郡太守中尉如郡都尉杜佑
通典云郡爲諸侯王國者置內史以掌太守之任然則
王國有內史有相而無太守矣漢書廣陵太守二人一
爲王建一爲陳萬年王建爲廣陵太守當成帝元延元

年是時廣陵哀王獲以鴻嘉四年薨靖王守以元延二年立中間六年無王建爲太守適當其時猶有說也乃廣陵厲王胥以武帝元狩六年立至宣帝五鳳三年自殺而陳萬年爲廣陵太守在神爵元年是時廣陵王國如故何以有太守且不獨此也膠東國有太守延廣當武帝太初三年時則膠東載王通平之五年也孔光傳光舉故東平太守成公敞爲尙書令當成帝綏和間其爲太守宜在前故云故東平太守也而東平煬王雲以建平三年自殺綏和以前則王國如故也儒林傳冷豐爲菑川太守冷豐爲顏安樂弟子當在宣帝時菑川頃

王遺以武帝元封二年立歷三十五年當昭帝元平元年薨思王終古立歷二十八年當元帝初元三年薨考王尙立歷六年當永光四年薨孝王橫立是歷武昭宣元皆爲王國也因又考之中山懷王脩以地節元年立十五年薨當五鳳三年元帝初元五年立清河王爲中山王其間十二年中山無王而百官表稱甘露四年中山相加守廷尉然則王國之相郡之太守其名可通稱故晉袁喬以司馬領廣陵相謝元以兗州刺史領廣陵此廣陵相卽廣陵太守沿漢時王國名也

廣陵考六

杜佑通典謂三國時魏以廣陵爲重鎮引文帝幸廣陵
張遼屯海陵爲證考之非也廣陵故屬徐州袁術據壽
春時廣陵已屬術術使吳景爲廣陵太守術稱帝景乃
委郡去呂布襲下邳先主東取廣陵術與之戰而布不
爭可知自陶謙以來歷備及布雖主徐州而廣陵亦非
所屬建安二年曹公征術術棄軍走渡淮是時廣陵蓋
爲曹得故曹公使陳登爲廣陵太守也先賢行狀言孫
策圍登於匡琦城退而復來登求救於曹公公遷登爲
東城太守孫權遂跨有江外曹公臨江有自悔不用陳
元龍計之歎是時曹公正與劉表相持孫策且有入許

之志新定江東北破廬江曹公不暇與爭徒使登遷亦
勢使之也及荊州旣下赤壁喪師孫權旣攻合肥建鄴
秣陵立濡須臨以爲重鎮濡須在和淝之間爲廣陵之
上游旣扼其要則堂邑以東魏不復能守所謂跨有江
外者以此東城在九江是時曹地在鳳壽以西故遷登
於此而以廣陵一帶棄於吳所以有封豕爪牙之歎也
建安十八年曹公攻濡須口不克恐江濱郡縣爲權所
略徹令內移民轉相驚白廬江九江斬春廣陵戶十餘
萬皆東渡江江西遂虛

江西謂江北

合肥以南惟有皖城然

則是時廣陵民戶逃亡郡縣皆廢宋書州郡志云三國

時江淮爲戰爭之地其間不居者各數百里其射陽海陵高郵江都鹽城等縣明注三國時廢曹公是時惟經營於壽春合肥之間豈復能使淮東荒廢之區更爲保障乎十九年孫權破皖獲太守朱光使呂蒙爲廬江太守屯尋陽其後蘄春亦爲吳有則沿江郡縣盡入於吳廣陵又何足論孫韶傳言韶食曲阿丹徒爲廣陵太守又云韶爲邊將數十年常以警疆場遠斥堠爲務先知動靜而爲之備青徐汝沛頗來歸附淮南潁江屯堠皆徹兵遠徙淮泗江淮之地不居者各數百里韶以赤烏四年卒其爲廣陵太守在權未爲吳王之前卽在建安

十八年後魏之斥埃遠徙淮泗則廣陵之地魏不復能
守之而實韶之所拓也乃民戶旣殘城居荒廢韶雖爲
太守其實仍駐丹徒以遙領之廣陵治本在射陽地邇
淮泗鄧艾屯田作白水石鼈等陂正在射陽界內然則
高郵以北魏戍所在吳亦不得居之也嘉禾三年權率
衆圍合肥新城使孫韶等向廣陵淮陽周魴誘曹休亦
稱孫韶入淮是廣陵爲韶之門戶與廬江並峙者也權
旣遷都武昌魏文帝有窺江南之意黃初三年使曹休
張遼乘舟至海陵臨江以窺之時呂範主丹陽徐盛守
廬江孫韶領廣陵遂於洞口拒之值大風船沒休乃得

乘舟至海陵使臧霸襲徐陵徐陵今常州地海陵對岸也時休爲揚州刺史與遼同駐合肥僅乘天幸臨江而旋遼之歿於江都亦居舟次耳非屯江都而卒於是也五年魏文帝爲水軍親御龍舟循蔡潁浮淮幸壽春揚州界九月遂至廣陵赦青徐二州劉子揚傳云五年幸廣陵泗口然則文帝是年僅緣淮至泗口而已泗口屬廣陵郡地故曰遂至廣陵幸壽春揚州界者亦第循淮水至揚州界究亦未幸壽春耳明年八月帝以舟師自譙循渦入淮從陸道幸徐九月築東巡臺冬十月行幸廣陵故城臨江觀兵徐地在泗州臨淮之間

見括地志
太平寰宇

記蓋由泗州陸行至廣陵言廣陵故城則地廢可知然而戎卒十餘萬旌旗數百里徐盛用薄落圍假樓以耀之孫韶遣高壽於徑路以要之早歎吳之有人悚然於天之限南北而副車羽蓋且失自是不敢更窺江左而廣陵之不得爲魏鎮不更彰明較著乎晉書宣帝紀云黃初五年天子南巡觀兵吳疆六年天子復大興舟師征吳又云天子自廣陵還洛陽天子卽魏大帝幸廣陵而謂之觀兵吳疆則廣陵固吳地矣五鳳二年孫峻當國有北伐之志使馮朝城廣陵拜將軍吳穰爲廣陵太守至是始城廣陵足證前此之廢孫峻傳云峻欲城廣

陵朝臣知其不可城而畏之莫敢言惟滕允諫止不從而功竟不就時峻將北伐故城廣陵使馮朝督徐州諸軍將以是爲重鎮以制魏明年使呂據等由江都入淮侵魏事未定而峻遇害呂據亦返不獨魏之伐不果而廣陵之城亦不就然則終三國時廣陵皆廢論其所屬則吳得而有之魏不得而有之也

此篇采
八府志

廣陵考七

宋齊南兖州之境北至於淮南至於江東至於海西至今泗州盱眙西南至今江浦六合而漢之東陽射陽平安三縣不爲南兖州所領東陽射陽二縣僑置於江南

之南徐州平安一縣廢而不置竊爲疑焉已而思之蓋漢廣陵一郡之地析其東南爲海陵郡析堂邑以西爲秦郡析平安以西爲盱眙郡析射陽以北爲山陽郡廣陵太守所治止江都廣陵高郵海陵四縣而已故宋志於山陽郡明注爲射陽縣境山陽所領山陽鹽濱左鄉東城四縣蓋射陽鹽濱平安之地所分矣盱眙郡所領考城陽城直瀆信都睢陵五縣盱眙之西若今之滁州臨淮等地已別屬馬頭歷陽等郡而盱眙五縣其必東統天長而緡入漢之平安矣南齊於山陽郡立北兖州而陽平一郡所領泰清永陽安宜豐國卽寄山陽境內

而安宜卽漢之平安也南齊志稱盱眙郡陽平石鼈田
稻豐饒石鼈在今寶應縣之西地屬寶應北周於此立
石鼈縣隋并入安宜然則平安一縣西入盱眙東入山
陽故晉宋廢而不見於此可考矣

廣陵考八

晉安帝立盱眙郡領考城陽城直瀆三縣南齊之盱眙
郡所領三縣如故永明七年割山陽官瀆以西爲壽張
割直瀆破釜以東爲淮安同隸東平郡太平寰宇記云
白水陂在寶應縣西八十五里與盱眙縣破釜塘相連
今寶應縣西與盱眙縣界上有白水塘故蹟卽白水陂

也然則破釜以東正當今寶應縣地以是準之可知南齊僑立東平一郡正在今寶應之地且可知直瀆一縣之地本有寶應之半也南齊志言陽平郡寄治山陽周山圖傳言表於石鼈立陽平郡見納然則石鼈卽當時山陽境內而當時之山陽有今寶應之半矣

廣陵考九

宋齊之廣陵屬南兖州卽今揚州府是矣而魏書地形志云東豫州太和十九年置治廣陵城孝昌三年陷武定七年復又云廣陵郡興和中分東豫州置領縣五宋安光城安蠻新蔡汝南皆興和中置隋書地理志云汝

南郡新息後魏置東豫州梁改淮州梁書太清元年改
北廣陵爲淮州此廣陵爲北魏所置非南兖之廣陵也
然兩廣陵一瀕江北一瀕淮北皆爲南北分爭之地或
屬南或隸北史書所稱往往惑人爲通考之南兖之廣
陵自宋及梁皆爲南地元嘉二十七年雖經魏太武之
蹂躪然第失人民而土地未損至梁友清時南康嗣王
蕭會理以前皆南朝刺史鎮之侯景之亂使重紹先代
會理而廣陵遂爲侯景所有來疑祖皓雖倡義誅紹先
旋亦覆敗而景將侯子鑒郭元建復爲南兖刺史矣北
兖刺史蕭祗以州降魏於是今寶應以北屬魏南半屬

侯景魏遜於高齊齊遣辛術圍陽平郭元建赴援拒之
則陽平石鼈尙爲景地北齊書辛術傳言王僧辯破侯
景南兖州刺史郭元建以傳國璽送術至是廣陵乃歸
北齊是爲齊天保三年梁元帝承聖元年也先是陳霸
先雖出廣陵納郭元建之部曲三千人而廣陵之地已
入於齊矣齊改爲東廣州而梁陳所設南兖州刺史皆
遙領無實地承聖三年霸先攻廣陵城秦州刺史嚴超
達圍涇州侯瑱張彪出石梁魏遣步六汗薩救涇州是
時秦州尙屬梁秦州今六合也涇州石梁今天長也北
齊書天保六年梁秦州刺史徐嗣徽以州內附是爲梁

紹泰元年至此而江北諸州乃盡沒於齊陳宣帝太建
五年吳明徹北伐明徹攻秦郡克仁州進逼壽陽別遣
程文季圍涇州進攻盱眙仍隨明徹圍壽陽時都督黃
法甌同樊毅任忠出歷陽人合肥之郛克霍州明徹又
別遣徐度之子徐敬成自歐陽上圻由廣陵出樊梁湖
下淮克淮陰鹽城山陽三郡進克鬱州合諸傳觀之明
白如繪歷陽今和州樊毅自隨黃法甌由和州而合肥
而霍州與徐敬成未嘗一路也樊毅傳云毅率衆攻廣
陵楚子城拔之擊走齊軍於潁口齊拔滄陵又破之蕭
摩訶傳云摩訶從攻秦郡北齊書皮景和傳云吳明徹

圍壽陽勅合皮景和與賀拔伏恩等赴救頓兵淮口頻有催促始渡淮屬壽陽已陷狼狽北還陳將蕭摩訶率步騎於淮北滄陵城截蓋樊毅從黃法甌旣克霍州遂合兵壽陽與蕭摩訶同破齊師於滄陵此一役也南兖之廣陵徐敬成下之東豫之廣陵樊毅克之於是南北兩廣陵皆入於陳周書大象元年十一月韋孝寬拔壽陽梁士彥拔廣陵陳人退走於是江北盡平而陳書太建十一年十一月亦書周將梁士彥圍壽陽克之又克霍州南北兖晉三州及盱眙山陽陽平馬頭秦歷陽沛北譙南梁等九郡譙北徐二州淮南之地盡歸於周此

梁士彥所拔之廣陵卽南兖之廣陵蓋自南而北極於
東豫州之廣陵自北而南極於南兖州之廣陵各書攻
克之所及也韋孝寬已拔壽陽則東豫之廣陵旣拔可
知徐敬成已下山陽淮陰陽平則南兖之廣陵旣下可
知是又可按文而辨之者周書大定元年書陳將周羅
喉攻陷胡墅蕭摩訶寇江北胡墅乃江北瀕江之縣亦
不復能深入蓋自韋孝寬盡平江北而廣陵遂不復南
矣此南兖州之廣陵也東豫之廣陵在晉宋本不名廣
陵自魏神䴥四年攻滑臺河南悉沒於北而是地遂爲
扼要宋明帝太始二年十二月薛安都引魏軍而淮北

西州及豫州淮西地遂失而北廣陵乃入於魏魏顯祖
皇興之二年也地形志稱東豫州太和十九年置治廣
陵城太武封魯爽弟魯秀爲廣陵公孝文帝紀太和三
年十一月隴西王元琛三將出廣陵此皆魏之廣陵十
九年緣田益宗來降始於廣陵立東豫州州立於是年
廣陵非立於是年也直至魏末元慶和來降梁而東豫
之廣陵乃復屬於南梁書裴邃傳云子之禮別攻魏廣
陵城平之夏侯夔傳云普通八年勅夔帥壯武將軍裴
之禮出義陽道是時譙州刺史湛僧智圍魏東豫州刺
史元慶和於廣陵入其郛慶和請降詔以僧智領東豫

州鎮廣陵夔引軍屯安陽又遣偏將屠楚城地形志言
孝昌三年陷是也北廣陵旣入於梁於是魏人又分東
豫州別立廣陵郡地形志言廣陵郡興和中分置是也
魏書孝昌三年九月東豫州刺史元慶和以城南叛梁
書大通元年十月魏東豫州刺史元慶和以渦陽內屬
太清二年正月東魏克渦陽地形志言武定七年復是
也陳太建五年樊毅攻廣陵楚子城卽夏侯夔所屠之
廣陵楚城也吳明徹攻壽陽齊人退於金城明年廣陵
金城降卽此金城也至此南北兩廣陵又歸於南至太
建十一年而南北兩廣陵又入於北其稱北廣陵者蓋

元慶和之降夏侯夔裴之禮之攻在普通八年改爲淮
州在太清元年其未改名淮州之前此十數年中稱此
地爲北廣陵也凡爲東豫州之廣陵者如此

廣陵考十

南兖之名始於宋永初元年歷齊梁陳皆鎮廣陵而魏
書地形志云南兖州正光中置治譙城領郡七縣二十
一隋書地理志譙郡後魏置南兖州周改亳州今屬潁
州府地近河南故舊以隸河南也魏書孟表傳云因事
南渡事蕭鸞爲馬頭太守十八年表據郡歸誠除輔國
將軍南兖州刺史領馬頭太守賜爵譙縣侯鎮渦陽又

王肅傳云肅鸞遣將裴叔業寇渦陽劉藻等救之爲叔業所敗肅表求更遣軍援渦陽詔曰當作必尅之舉不可爲狐疑之師徒失南兗也太和時南兗治渦陽不治譙渦陽今鳳陽府之蒙城縣地正光改治譙城則移而西北矣自正光以來歷北齊周隋凡稱南兗州者皆譙也北齊書所載南兗州刺史鮮于世榮東方老李希光堯傑崔劼叱于苟生封述凡七人行南兗州事一人羊肅唐獨孤及毘陵集唐鄭府君墓誌銘云齊中書監南兗州刺史諱述祖公之六代祖北齊書鄭述祖傳作兗州刺史凡此皆譙也

廣陵考十一

魏書田益宗傳云太和十九年拜員外散騎常侍都督光城弋陽汝南新蔡宋安五郡諸軍事冠軍將軍南司州刺史光城縣開國伯後以益宗旣渡淮北不可仍爲司州乃於新蔡立東豫州以益宗爲刺史按孟表以十八年爲南兖州刺史治渦陽裴叔業之圍渦陽在十九年之後是時南兖東豫儼分爲二一在淮水以北一在淮水以南不相混也惟地形志言太和十九年置東豫州治廣陵城則新蔡爲廣陵矣而東豫州刺史元慶和降梁梁以湛僧智爲東豫州刺史鎮廣陵而梁書則稱

元慶和以渦陽內屬於是魏分東豫州之宋安光城安
蠻新蔡汝南爲廣陵梁遂以元慶和所降之廣陵爲淮
州然則一廣陵也旣爲新蔡又爲渦陽矣乎竊爲考之
東豫領郡六其孝昌三年陷於梁者在東豫州所屬則
汝南郡之南新息東新蔡郡之固始鮦陽苞信汝陽新
蔡郡之苞信弋陽郡之弋陽在南兖州所屬則下蔡郡
之樓煩下蔡臨淮龍亢譙郡又云譙州景明中置渦陽
郡孝昌中陷武定七年復置州治渦陽城然則慶和之
降東豫之廣陵南兖之渦陽一時並陷故史或稱廣陵
或稱渦陽而梁則以廣陵渦陽等凡所降之地統爲淮

州於是廣陵與渦陽合究之廣陵非渦陽也說者指廣陵卽渦陽未加深考耳

廣陵考十二

晉義熙七年以前不分南徐南兖之名徐青兖刺史不必皆治廣陵而廣陵之地則隸之義熙七年分淮北爲北徐淮南爲徐州而南兖之稱始於宋永初永初以前凡稱徐州兖州皆非北徐北兖故武帝所加司豫北徐雍四州刺史則稱北徐以別於徐而王仲德爲北兖州刺史亦自別於兖州也永初二年加徐州爲南徐於是淮北但曰徐元嘉八年始分江以南爲南徐江以北爲

南兖然則永初二年以後元嘉八年以前凡稱南兖州
南徐州正無分於江南北是時南徐刺史與南兖刺史
同在江以北也元嘉三十年正月并南兖於南徐六月
復分南徐立南兖則二月至五月南徐刺史兼治南兖
而廣陵屬南徐矣申恬傳云恬從父兄永歷青兖二州
刺史在高祖踐阼前恬父宣元嘉初亦歷青兖二州刺
史元嘉初青兖爲北青北兖而永初以前南兖單稱兖
北兖加北字此申永所爲青兖二州蓋蒙下申宣所爲
青兖二州皆北青北兖也州郡志言兖州刺史武帝平
河南治滑臺平滑臺在義熙十二年僞兖州刺史韋華

率衆降遣北兖州刺史王仲德平滑臺十月至雒陽平
河南蓋前此兖州刺史治廣陵自僞兖州刺史章華降
乃立北兖州刺史使王仲德領之既平滑臺卽治於此
申承歷兖州刺史蓋在王仲德之後此時兖州刺史治
廣陵者世子領之豈申承新附之人所得爲哉故申承
爲青兖二州刺史雖在武帝未踐阼以前自爲北青北
兖而非廣陵所治之青兖也檀道濟爲兖州大中正道
濟爲高平金鄉人是時北兖已得故爲其鄉之大中正
此兖州亦非南兖是皆宜推而通者也

廣陵考十三

東廣州刺史見於北齊書者惟王敬寶一人附王則傳末亦見段榮傳謂之廣陵刺史互相詮釋明東廣州卽廣陵史文之善也陳書高帝紀梁大寶三年侯景將郭元建奔齊高祖納其部曲三千人而還七月廣陵僑民朱盛張象潛結兵襲齊刺史溫仲邕遣使來告高祖率衆濟江以應之會齊人來聘求割廣陵之地王僧辯許焉高祖引軍還南徐州江北人隨軍而南者萬餘口按陳霸先攻廣陵城王敬寶在齊天保五年當梁承聖三年而大寶三年卽承聖元年是年三月郭元建獻傳國璽於辛術七月僑民襲齊刺史溫仲邕則仲邕卽齊東

廣州刺史也蓋郭元建旣降於齊不復爲南兗刺史而以仲邕代之仲邕被襲或殺或亡俱未可知王敬寶在其後當由廣陵旣割而授之後敬寶與蕭軌等攻建業沒於梁在天保七年梁之太平元年南史陳本紀紹泰二年三月齊遣水軍儀同蕭軌庾伏連堯難宗東方老侍中裴英起東廣州刺史獨孤辟惡洛州刺史李希光出柵口向梁山六月虜蕭軌東方老王敬寶李希光裴英起王僧智等四十六人是役王敬寶與東廣州刺史獨孤辟惡同行則是時敬寶之東廣州刺史已辟惡代之矣其後東廣州刺史不見於史蓋齊之重鎮在譙

不在廣陵故吳明徹北伐大軍直趨壽春而廣陵一路
但令徐敬成平之而廣陵亦城守不敢出太平寰宇記
云吳官臺在縣西北四里陳將吳明徹圍北齊東廣州
刺史敬子猷增築子猷爲東廣州刺史蓋在王敬寶後
其卽指徐敬成時乎

廣陵考十四

隋書地理志吳州有四皆屬職方揚州一云江都郡梁
置南兖州後齊改爲東廣州後周改爲吳州開皇九年
改爲揚州置總管府大業初府廢于顓始爲東廣州刺
史嗣進爲吳州總管此吳州卽東廣州是爲江都之吳

州也一云吳郡陳置吳州平陳改曰蘇州大業初復曰吳州宇文述傳云前軍陷吳州蕭瑛以餘衆保包山此吳郡之吳州也一云會稽郡梁置東揚州平陳改曰吳州置總管府大業初府廢置越州韋冲傳云吳州賊帥羅慧方聚衆攻婺州此會稽之吳州也其一云鄱陽郡梁置吳州陳廢平陳置饒州此吳州隋所不置姑無論矣其吳州之置於隋者二而有總管府者江都與會稽兩郡而江都之吳州旣於開皇九年改爲揚州則九年以後之吳州總管爲會稽之吳州矣隋書稱吳州總管者于顗之外三人其一字文弼以開皇二十年正月爲

吳州總管其一楊异以開皇十二年九月爲吳州總管
至二十年九月楊异卒宇文弼傳說文不明楊异傳則
稱晉王鎮揚州詔至异每歲一與王相見是時晉王已
在江都而异在會稽相去遙遠故歲一相見异以二十
年九月卒弼以二十年正月爲吳州總管者必是時异
老病不能治事使弼攝而代之而异越八月乃卒仍以
吳州總管書之以基罕於官也此二人皆會稽之吳州
周大象元年十一月取陳江北地是時南充始屬於周
周書趙文表傳云大象中文表拜吳州總管時開府于
顓爲吳州刺史手刃文表隋文以諸方未定恐顓爲變

遂授顗吳州總管隋書于顗傳云高祖受禪文表弟詣
闕稱兄無罪上令案其事貶爲開府賀若弼傳云高祖
受禪有并江南之志拜弼爲吳州總管與壽州總管源
雄並爲重鎮則弼蓋繼顗爲之者此皆江都之吳州故
賀若弼伐陳自吳州出師卽自其鎮出也平陳後吳州
旣改弼爵亦加吳州總管一職以趙文表始以賀若弼
終止此三人而已

蔡中郎焦君贊考

蔡中郎所撰焦君贊或謂卽贊焦孝然按孝然事詳見
三國志注魏略言中平末白波賊起時先年二十餘隨

同郡侯武陽客於揚州白波賊起於靈帝中平五年蔡
中郎死於獻帝初平三年相距止四年正孝然客揚州
時況前此其名未顯其年甚少烏得而贊之而君之建
安初太陽長朱南猶以先爲亡士欲捕取以武陽言給
食令埋疫病死人至魏受禪後結瓜牛廬潔身獨處又
以伐吳爲牂羊之歌人始知爲隱者在中郎時正未知
有孝然也中郎贊云鶴鳴九皋音亮帝側迺徵迺用將
受袞職則焦君嘗徵薦及之孝然無是也贊云昊天不
弔賢人遘戕又云惜哉朝廷喪茲舊德則是歿後之辭
且必焦君固嘗身列朝廷也孝然當嘉平中太守賈穆

造廬與食司馬景王使安定太守董經因事過視經以
爲大賢皆在中郎後數十年亦絕無徵辟入仕之事與
贊語全不合贊非爲孝然無疑惜乎焦君元墨之德傳
自中郎而里居名字則至今莫可考也

雕菰集卷十二

國史儒林文苑傳議

謹案太史公創儒林列傳推本孔子尊崇六藝班氏踵之所列之人皆經學也其以文章名家如枚乘東方朔之流皆有專傳范氏後漢書始目爲文苑後世史書或有或無或分或合以視乎一代文學之盛衰是故正始以後人尙清談迄晉南渡經學盛於北方大江以南自宋及齊遂不能爲儒林立傳梁天監中漸尙儒風於是梁書有儒林傳陳書嗣之仍梁所遺也魏儒學最隆歷

北齊周隋以至唐武德貞觀流風不絕故魏書儒林傳
爲盛是豈休文黜學伯起崇儒亦由其時興廢使然也
唐修晉書彊爲具數而范甯郭璞輩旣別有論列所謂
儒林者自劉兆一二人外半不足以稱茲目是其崇尚
虛元滅裂典章史臣業已歎之唐重詩賦經學寥寥至
以王紹宗歐陽詢徒工書法者用足儒學之數助匡質
雖曰傳經而三傳已束高閣浚井者第求美水而儒效
可覩矣宋史分道學於儒林然蔡元定卽考亭之徒陸
九淵倡心性之說宋之儒林不外道學分之實無可分
也有明二百七十年拾宋人之餘以大全講章取士歸

熙甫試文用鳥獸魚鼈無不咸若房官遂以爲怪間有
不安空陋如楊慎季本者已屬景星慶雲而於漢魏經
學猶隔霄壤來知德以反卦說易當時駭爲創獲則一
代之經學可知矣我朝列聖天縱多能通天地人
之全承伏羲黃帝堯舜禹文之學欽定諸經博采衆
說兩舉博學鴻儒一舉經明行修自天文術算律呂音
韻以至詩詞類書無不纂訂以惠天下乾隆間詔開
四庫全書館讎校寫錄分貯中外竊謂國初如黃宗
羲顧炎武雖已崇尚實學漸遠空疎而風氣初開道猶
未備至是陶鎔伊久迂滯悉銷經學文章遂爲二千年

來所莫能埒以揚聖天子稽古文思之德以彰二百年禮樂庠序之化則國史儒林文苑兩傳誠未可以漢唐宋明爲例如台敎所稱關係甚重云云也擬爲七則以備芻蕘

一日徵實家傳碑銘出諸子弟所請每多譽辭往往泛許通經僞臚撰述若第據傳聞不採蘊蓄則趙賓之易可消施孟矣今夫政績名德必求諸輿論乃公而可憑經學文章必覈之本書斯切而匪泛乾隆四十年以前大都收入四庫全書然其時祇登已故之人縱有毛萇伏勝一息尙存義從屏棄則生康熙三四十年後者容

有未與者矣譬如京房費直之易嚴彭祖顏安樂之春秋皆史記所不書蘭臺之帙不得專守龍門也或按名索其遺書或令各家自呈庶幾山澤之癯無憂滲漏虛聲之士不致濫竽也

二曰長編無著述者勿論矣篇籍旣存淺深精粗可按而得也周覽之不厭其煩深研之不憚其刻舍學究公家之言摘精神獨得之處一言偉卓不以細遺累卷通明不以繁節使條枚悉櫝宦奧盡融若示諸掌若貫於弗一展閱洞見作者苦心譬如縣八銖之鏡神妖莫潛萃五侯之鯖肥瘠並陳矣

三曰兼收小黃得隱士之說託於孟氏瑕邱傳穀梁之
經納於董生漢書並著之河北守服鄭之學青州奉王
杜之教魏書兩存之兼收備錄史氏之法也 本朝經
學昌明門戶胥化偏論之則宋氣獨呈彙舉之則精華
大備一古文書也有閭微君之疏證卽有毛檢討之覈
詞有齊宗伯之序錄又有王光祿之後案陸清獻譏詆
姚江湯文正移書破之而皆不失爲名臣至於吳人說
易父子殊方惠士奇易說獨申己意其子棟周易述則持守舊說徽士談天師弟
異轍江永宗西法戴震重中法文則易堂堯峯一張一弛詩則阮亭
秋谷或隱或見昔范蔚宗鄙專相傳祖之固元行冲恥

不言服鄭之非至於今日括囊大典網羅眾家既已
次為長編則亦不容偏廢耳

四日鑒別儒林文苑兩傳既分則各隸者不宜譌雜蓋
經生非不嫻辭賦文士或亦有經訓是必權其重輕如
量而授竊謂黃梨洲宗義毛大可奇齡全椒山祖望詩

文富矣而學實冠乎文朱竹垞彝尊姜西溟宸美汪鈍

翁琬非不說經而文究優於學主寅旭錫闡梅定九文

鼎陳泗源厚耀之推步錄於疇人傳中顧寧人炎武之

音學潘耒有類音毛先舒有韻學通旨王交河蘭生之

律呂德清胡彥昇胡滄曉煦惠定宇林之易胡精於宋

有樂律表微

漢易萬充宗斯大顧復初棟高之春秋胡牝明渭之禹貢

閻百詩若璩之尚書安邑宋鑒有張稷若爾岐之儀禮

儀禮和吳廷華有儀禮章句山陰馬駟有邵二雲晉涵之

爾雅高郵賈稻孫亦為此學近王自田懋之服膺朱

子他人講程朱理學皆浮游勦襲而已惟懋竒一萬季

野斯同之論定明史史記本屬春秋則亦六藝也唐書

史學者人之但能方望溪苞齊息園召南周書昌永年

敘事者入文苑

陸耳山錫熊之校輯諸書比之孔穎達褚無量等略江

慎修永戴東原震錢溉亭塘之聲音訓詁名物象數近

若程瑤田通菴錄揚州任大椿李皆於儒林為近同一

惇劉台拱顧九苞等皆為此學

校讎也何義門

焯

宜屬文苑

批評甲乙沿劉須溪孫月峯鍾伯敬茅鹿門一派

盧召弓

文昭

宜置儒林

比之陸德明孫奭

同之博物也錢辛楣

大昕

宜入儒林

所博者在學

袁子才

枚

宜歸文苑

所博者在文

推

之馬宛斯

駢

沈果堂

形

陳亦韓

祖範

應嗣寅

稿謙

孔塽

軒

廣森

朱笥河

筠

金檠齋

楊

武虛谷

億

王西莊

鳴盛

江

艮庭

聲

任幼植

大椿

張皋文

惠言

汪容甫

中

皆儒林之

選也

略舉所知非謂止此數人

魏叔子

禧

尤西堂

侗

施愚山

閏章

田

古懽

雯

周櫟園

亮工

吳梅村

偉業

陳其年

維崧

吳園次

汪蛟門

懋麟

馮山公

景

杭堇浦

世駿

皆文苑之雄也

亦略舉如此其實

他若孫奇逢李中孚之徒說經說理宜入文苑者甚多

無甚過人

孫有讀易大旨乃晚年所作中孚二曲集亦演姚江之說而已如宋之種放明之王艮

確能自守蒿萊不趨軒冕以入隱逸於類爲安

顧炎武黃宗義

亦不仕乃學識精博則宜入儒林傳矣

抑或立德可依卓行政事不愧循

良以著述核之宜去宜取宜彼宜此自有條而不紊矣

五曰詳載班范儒林傳分別師承脈絡井井盡其時各

守一家之學第明析其授受而其學已著至於司馬相

如董仲舒張衡崔駰之流則詳列其賦頌策論諸文揚

雄且錄其太元法言敘王符仲長統節錄其潛夫論昌

言兩書何也鴻功鉅業直敘自明學問文章非博引無

以信後故賢若倉公日者若司馬季主方復詳其診籍

備其問荅其位賤其望微非同公卿大夫功烈在人耳目以術藝傳必詳其術藝之過人以經學文章傳必詳其經學文章之過人不然於十二閑中獨指其駿不有以試其儼儼權奇之跡何以表異於牝牡驪黃也後來諸史若陳奇辨天水范縝論神滅祖冲之上新術表劉勰敘文心雕龍顏之推賦觀我生柳芳論姓系周濂溪說太極圖聶崇義證圭璧釜鑊李觀考訂明堂無不詳徵博引不厭瑣細惟其諸史所列之人不必皆有徵實抑或原有可採而史臣失之耳我朝儒學以考核通貫爲長竊謂爲諸人立傳宜以道古潛研兩集所載閎

若璩梅文鼎萬季野惠士奇錢塘江永戴震諸傳爲式
舉長編所錄精之又精核之又核或直錄其篇或節揭
其要如戴震之學錢氏詳矣然其生平所得尤在孟子
字義一書所以發明理道情性之訓分析聖賢老釋之
界至精極妙錢氏略舉之尙未詳著之也悉屏旁觀褒
異之虛文備列當身著述之明證史貴實莫實如之史
貴直莫直如之史貴信莫信如之本朝文集鉅製孔
多如謝少宰平定兩金川說六書正說敘寧不媲美相
如補翼叔重推斯以索美不勝收旣以標一人之實跡
卽以揚 昭代之文治不亦盛哉

六曰公論儒林以經文苑以文或有小節不拘而文學
實堪入選則瑕瑜並見互不容沒楊政之剛果任情牢
長之墾田不實徐邈之委蛇自安張吾貴之好爲詭說
李業興之疵毀謾罵劉炫之俳諧輕侮顏師古之多引
後生前史皆直筆書之矣杭氏作閭若璩傳稱其喙長
才黜錢氏所作傳則諱而不言毛奇齡好爲侮謾之詞
全椒山惡之並詆毀其經學竊謂學不可誣疵不必諱
述其學兼著其疵可也不當因其疵而遂沒其學也
七曰附見一傳而衆人附之史之通例也然談天雕龍
之附孟子郊慮王基任嘏之附鄭康成非謾然矣乃大

歷十子盧綸何以冠錢郎程門四先生楊時何後於游
謝此非以甫附杜以翫附張可比也大抵人士蕃多剪
裁任意孰主孰客非有定規惟以徵實次爲長編旣已
豪髮可鑑形神莫遁矣其精且博者取爲正傳或片長
足採或一脈相承以類而從庶乎公允若夫雖有撰述
無甚發明則第存篇目於藝文志而注其姓氏里居如
新唐書之體例可也隨其人之著述爲詳略隨其詳略
爲位置不徇於名不嫌於昵無則連州合郡不妨空缺
有則父子兄弟不難並書循以衰病餘生聞此盛舉又
值司此事者皆石渠天祿之才一隅之見宜覆醬瓿辱

承下問妄獻愚忱云爾

勘倭本鄭注孝經議

武康徐熊飛所得日本鄭注孝經一本以經典釋文及正義核之固有合者而舛而不備者甚多今略舉其可疑者諸侯章釋文有費用約儉奢泰爲溢等文明皇注云費用約儉謂之制節慎行禮法謂之謹度無禮爲驕奢泰爲溢正義云此依鄭注釋制節也其他雖未言依鄭而奢泰爲溢一語明注釋文疑其皆本諸鄭此刻惟有費用約儉語其下皆異可疑一也釋文有薄賦斂省徭役列士封疆等文列士蓋列土之譌乃解富貴不離

其身保其社稷語也此刻保其社稷下無列士封疆注而繫薄賦斂省徭役於和其人民下然則列士封疆將亦解和其人民乎可疑二也卿大夫章釋文有夜莫也懈惰五字此刻云夜暮也以事天子勿懈惰按釋文也字連懈字此則相間矣明皇注云懈惰也以惰釋懈鄭注恐亦如是易也爲勿可疑二也士章明皇注云言愛父與母同敬父與君同正義云此依孔傳也下列劉炫云云注又云言事父兼愛與敬也正義云此依王注也注又云移事父孝以事於君則爲忠矣移事兄敬以事於長則爲順矣正義云此依鄭注也旣分爲依孔依王

依鄭則大義必殊非止字句之小異也此刻云愛與母同敬與君同并此二者事父之道也此正合孔王二說可疑四也庶人章釋文於以養父母下有行不爲非度財爲費什一而出無所復謙等文此刻云行不爲非爲謹身富不奢泰爲節用度財爲費父母不乏也揆之釋文行不爲非解謹身度財爲費解節用申言度財之義云什一而出無所復謙謙卽不足之義此十六字一連貫注詞義皆足乃通貧富而言之非戒奢泰也此刻之注乃解節用爲富不奢泰遠非鄭義且不曰無所復謙而言父母不乏可疑五也釋文故患不及其身也善此

刻有上句無善字但云未之有者未之有也不辭可疑
六也三才章釋文有孝弟恭敬民皆樂之八字相連此
刻有之而繫孝弟恭敬於民之行也下分繫民皆樂之
於不肅而成下云順治天下下民皆樂之可疑七也孝
治章釋文有聘問天子無恙語此刻云古者諸侯大夫
聘問天子天子待之以禮無無恙字釋文又有郊迎芻
禾百車以客禮待之夜設庭燎當爲王者侯者等文盧
氏拾大行人疏御覽所引此刻有之釋文故得萬國之
歡下又有五年一巡守勞來等文盧氏拾王制疏引孝
經注云諸侯五年一朝天子天子亦五年一巡守揆之

王制疏乃類舉其略五年一朝卽撮上節注也此刻無
天子巡守文而複舉諸侯五年一朝可疑八也聖治章
明堂者天子布政之宮明皇注也正義引鄭氏曰明堂
居國之南南是明陽之地故曰明堂此刻之注同於明
皇而鄭所云無之又釋文有於朝越嘗重譯等文此云
周公行孝朝越嘗重譯來貢刻此者云據釋文孝下少
一於字然行孝於朝文未善無於字則不合釋文可疑
九也經文因嚴以教敬因親以教愛釋文有致其樂親
近於母等文此蓋解親愛若曰嚴近於父親近於母親
字斷句此刻注云因親近於其父教之爲愛改母爲父

復增其字與釋文之義便殊可疑十也五刑章盧校釋
文云科條三千謂劓墨宮割臙大辟穿窬盜竊者劓劫
賊傷人者墨男女不與禮交者宮割壞人垣牆開人關
鑰者臙手殺人者大辟此刻注五刑謂墨劓割宮割大
辟也易科條三千爲五刑二字與明皇注合又盧氏校
書好自改易其考證云臙舊脫今補呂刑作剕尙書大
傳白虎通俱作臙又於鑰下增者臙云二字今補務之
通志堂本無此諸字釋文斷續爲體不必補且釋文於
經文下有所訓解每卽用本注此五刑之屬三千下注
云墨劓剕宮大辟明皇注亦作剕然則盧氏所補之臙

字烏知舊非荆字而此刻本作臆竟同於盧氏所補可疑十一也廣至德章釋文有天下父事三老天子兄事五更等語此刻注云天子無父父事三老天子無兄兄事五更多二無字正義云舊注用應劭漢官儀天子無父父事三老兄事五更舊注未必卽是鄭注可疑十二也其後跋云右今文孝經鄭注一卷羣書治要所載也其經文不全者據注疏本補之羣書治要未識彼地何書相傳魏徵所纂揆其所云蓋就是書撫拾而出如近人拾太平御覽以成書也卽真鄭注當時已經刪節故經文且有不全而所拾之注其果卽翕然所獻之殘文邪乃今

考之其中少有菁華則皆見於釋文注疏諸書而諸書所見此中不備者十之七八雖真鄭注亦已糟粕夫鄭氏所以足重者菁華也去其菁華止存糟粕雖親見其操筆而書亦何足重且鄭氏詩箋禮注並立學官其他殘注散見典籍中者光采自不可沒又安用此疑似之糟粕爲乎然世人賤目而貴耳疏存而念亡禮注詩箋通者甚鮮而易書論語等注則爭相拾之不倦設此本廢而不存數十年後有言及者必有惜此書之不梓行而深恨傳播者之無其人抑或別有傳之者竟以爲真正鄭注復出如向之皇侃論語疏孔氏古文孝經直信

不疑雖不同三墳詩說之無稽而古人傳聞異辭之義
或有所未合竊謂莫如存之而題曰日本鄭注孝經不
使混於學官所立諸經傳而置其真僞於不論不議則
既絕後人以耳代目之議亦絕海外以僞書入中國之
萌其敘云志在傳諸瀛海之西抑知中國所重正不用
此糟粕邪嘉慶六年五月二十六日江都焦循議

依斗定尺議

依斗定尺之法極精於理且便於用天文家用一萬分
爲日周通法卽此義也其法宜用通分依斗之方以爲
尺析一尺爲十寸卽以一寸爲龠十寸爲合百寸爲升

半寸爲斗萬寸爲石以此尺量得修若干廣若干高若干三者連乘通分得寸數隨萬千百十收之卽石斗升合稍識九九者皆能算之若不用通分則以立方一尺爲斗廣尺修尺高丈爲石廣丈修丈高尺爲十石立方一丈爲百石廣丈修丈高十丈爲千石大約立方十丈以上寸數紛繁可參用此立方不及十丈者通分寸數爲便

郡縣議議

顧亭林致書黃梨洲云炎武中年以後不過從諸文士之後積以歲月窮探古今於聖賢六經之旨國家治亂

之原生民根本之計漸有所窺其自任如此於是尊之者以爲亭林非文章之士而王佐之才也余則惑焉余家塾有所著日知錄少時閱之其摘錄古書足以備掌故考核固猶是文章之習焉爾今偶於浙人所選文集集中見其所爲郡縣議九篇自謂之詞曰後之君苟欲厚民生強國勢則必用吾言細揆之其謬戾不可勝言幸而亭林以文士老死萬一有用於世而得行其說其害有甚於王安石之行新法新法之弊已著無不隨聲以詈而亭林之說則惜其不仕於世以大展其學吾爲亭林幸又爲尊亭林者太息焉古之所以行封建者一

以酬功臣一以存故國天下安之也且建一國則其屬
有卿有大夫有士而學校之立司馬之升不廢也使突
於黎庶中指一人以與之國而世之三代以來未聞有
是也今天下之縣數千而舉數千人使世爲令田賦悉
歸之此數千人者果皆足以闢土地治田野蕃樹木修
溝洫固城郭實倉廩興學校屏賊盜乎果皆能使人民
樂業乎亭林之言曰使天下之爲縣令者不得遷又不
得歸其身與縣終子孫世世處之不職者流貪以敗官
者殺不誠小兒語邪夫才難孔子所歎也中人以下全
視乎驅使省察以爲賢否天下之勢以三十年言之大

約生才不過數十人耳今以縣令數千餘人而人人期其才安得數千百龔黃以應之也緣不知其才而試之三年而後卽真吾恐紛紛然試之不已而所謂厚民生強國勢者無日而定無已又設太守三年一代御史一年一代葉正則謂官無封建吏有封建者此則大吏無封建小吏有封建令之子賢而不得爲太守御史令之子不肖而不難於爲令非令之子孫布衣草野之士得爲太守御史加於令之上而察之而太守御史之子孫又不得如縣令之世有其官其戾於古而不當於事情可無煩言而自詘不謂寧人素有經濟王佐之名而立

論乃若此其悖也其說固必不能行於世然學者誦於其名或不察其言也議之以爲聽言者例

俗禮答問一

俗間祭婦人多用舅姑爲主不用夫或問焦子曰夫不祭妻禮何爲其然也焦子對曰夫不祭妻禮文以餽餘言之也謂餽餘之祭唯夫之於妻父之於子可不祭其他皆祭也且夫不祭者以其尊也舅之於婦益尊矣子之有父猶婦之有舅姑也父不祭子而舅可祭婦乎

俗禮答問二

或問焦子曰今之喪斂衣不用紵禮與焦子對曰喪大

記結絞不紐則今之不用紐者沿古制也乃古者生時衣帶取其可解則用紐紐猶今俗所謂活結耳歿則不復解衣帶皆用死結所謂不紐也今既不用紐亦不復用帶則大非矣

俗禮答問三

或問焦子曰居三年喪未卒哭而死以斬縗斂禮與焦子對曰非禮也父母之喪三年以凶服斂是無除服之時也死則侍親地下矣可凶服侍乎

俗禮答問四

或問焦子曰服既除以葬故而斬衰禮與焦子對曰非

禮也古者天子七月而葬諸侯五月大夫三月士踰月
國律職官庶民三月而葬又曰凡有喪之家必依禮安
葬若惑於風水及托故停柩在家經年暴露不葬者杖
八十無除服而葬者也故古無人不葬者改葬之服昌
黎議之極詳不得已而改葬服總焉可也

咎由人已對示二李生

本善
元善

癸丑之春焦子居門人自外至卒然問曰咎由於己與
由人者有間乎曰有間咎由於人者聖賢不去也然則
時人之所惑者宜矣曰爾何聞曰今有大吏索其屬銀
屬不堪其迫竊國課與之事發均伏誅街里市巷之間

以迫憐屬謂其非貪吏也如夫子言不已然與焦子艱
然曰惡是何言吾所謂咎由於人者非此之謂也南山
之麓有獸曰狌狌愛酒焉人誘以醉而刺其血小平之
津有魚曰鱣巨鱗多口重千斤甘人之餌而致於屠其
誘與餌人也使匿轡械之間潛淵泉之當_{當底也}安分而
守命焉人不得而致之矣君子讀書稽古一畝之官可
以宅身自食其力以全其天雖有貪夫其何我迫卽或
抱用世之才資格而進之屈伸之間聽其自至於彼何
求於我何脅且處以逸吾身仕以逸吾世當路之人舉
我升我是欲我措其學於世也措焉可矣當路之人抑

我滯我是不欲我措其學於世也不措焉可矣惑者昧焉不以人之用舍爲進退而以人之喜怒爲榮辱其未得也不恤調阿嬖褻以獻其肺腑醵錢稱貸以供其資緣以爲竭此精力舍此性情一旦可以榮祖考光宗族鄉黨吐其氣於友朋振其勢於妻妾子弟枉尺而直尋迂腐者未足以語此不知吾之志旣卑吾之可輕可賤之態已備入於當路者之心當路而賢也必惡而遠之倘其不然不過謂是人也可供我之役使收之於家奴養子之列而乃不以爲辱以爲榮求援之不已彼亦求報之不已我已受其恩又益望其加恩於是雖得罪於

天子之法不敢不應大吏之求卒之事敗身誅悔之莫
及其咎也人與己與小子聽之願介而窮毋辱而顯也
介而窮身屈而心伸也辱而顯身伸而心屈也門人聞
之欣然而退守其真固其神將誦讀以終其身

屬文稱謂答

胡西琴先生問姑丈姊丈姨丈之稱於阮侍郎侍郎轉
以問余擬此以荅問曰從母之夫俗稱姨夫若入文章
似難落筆遍檢爾雅儀禮皆無此條姑丈姊丈亦是邪
非邪循按爾雅釋親父之姊妹曰姑男子謂女子先生
爲姊姑之夫無明文姊妹之夫謂之私詩譚公爲私是

也姑夫之稱見於六朝者如梁江干一姑夫朱異

梁書江干

傳北周蕭子雲爲王褒之姑夫

周書王褒傳

姊夫之稱漢時

已然郭林宗別傳稱林宗就姊夫貸錢五千

見太平御覽此

皆俗稱用諸屬文者也爾雅妻之姊妹同出爲姨母之姊妹爲從母然則姨者所以稱妻之姊妹非謂母之姊妹也姨之夫爾雅謂之亞古亦稱僚壻友壻從母之夫稱不載焉然而從母之稱姨亦古矣左傳穆姜之姨子也杜注穆姜姨母之子三輔決錄云周季貢班固姊之子也喪婦作問神姨曹大家難之大家爲周之從母則通稱從母爲姨自周至漢已然姨夫之稱宋時猶專屬

妻姊妹之夫歐陽文忠詩大姨夫作小姨夫是也竊嘗思之父母兄弟舅姑定稱也父之兄弟依父爲重則曰世父叔父其妻又因世父叔父而重則曰世母叔母母之姊妹依母爲稱則曰從母其內兄弟外兄弟從母兄弟則稱其父母爲父母故其子卽依兄弟爲稱也父之姊妹屬之父而不可稱母母之兄弟屬之母而不可稱父猶夫之父同於父而非父夫之母同於母而非母故同爲舅姑之稱依父母而通其變也因其爲姑之夫稱曰姑夫因其爲姊之夫稱曰姊夫名以義起也晉書王廙元帝之姨弟也杜少陵寄狄明府詩云梁公會孫我

姨弟從母旣通稱姨則通稱從母兄弟爲姨兄弟可也
北史元義納太后妹明帝呼曰姨父從母旣稱曰母則
從其類謂其夫爲姨父可也或名以義起則稱姨之夫
爲姨夫可也曰從母夫不辭則姨夫尙矣丈者古人泛
稱論語謂老者曰丈人儀禮謂男子曰丈夫皆無定號
今之稱姨丈姑丈姊丈者俗稱無可典據者也若施之
於文則無不可賦頌贊論祭文檄之類無取乎此惟敘
事文用之或述時人之言於辭氣中稱姨丈姑丈姊丈
皆可猶官名地名不必彊作古稱也或敘其人之親誼
則稱曰姨夫亦可必欲典雅則先稱從母之姓氏以夫

繫之隨文運用存之一心而已文章之道有二說經論古之文就古論古不可靡入時俗行狀墓志之文主於述當時之事卽爲將來之典要不必過於拘古也

學童讀爾雅荅

鮑席芬之子六齡其塾師將授之以爾雅問於余余曰非所以教也古者六年教之數與方名九年教之數日十年學書記幼儀十有三年學樂誦詩舞勺成童舞象學射御二十而冠始學禮博學不教數者一至十之數也方名者東西南北也日者干支時日數計之使知朔望中節歲陽歲陰之名也書記者書爲六書記爲計字

之誤九章算術也射御書數皆有用於世故自幼習之
既入小學春誦夏弦秋學禮冬讀書學政之掌專於樂
官孔子曰小子何莫學乎詩不學詩無以言童子血氣
無定性相近習相遠其間甚微且誦且弦使機之所蓄
畢達而無所鬱遏善善惡惡勃然於心志間善氣盈則
陽神長陽神長則愚闇消聰明日益滯塞日開有以達
古今之志而不爲迂儒故詩之教最先而又慮其肆也
節之以禮則陰陽得所調而中和之德於是基之孔子
之教莫要於此至爾雅訓詁雖不外乎六書然學之習
其執通其義無容誦爲也漢初經學久廢先王之教湮

蕭何草律以學童能諷九千字以上得爲史更進而通於六體則爲尙書天下動於利祿從而趨之間里書師合蒼頡爰歷博學三篇斷六十字爲一章以取便於誦習今所存急就章疊簇文字絕無條理卽其類也揚子雲取有用者作爲訓纂可知前此但務諷字之多可以干祿於古人教書數之旨已屬兩途乃其時爾雅屬孝經不屬小學固未嘗教童子以是也孝文立爾雅博士漢書不言見趙岐孟子題辭然豹文之鼠惟一終軍能識則當時習之者亦甚少蓋其時經生各習一師第守其師之說不復能究其師學之所出故爾雅雖訓詁之

指歸而執爾雅之文卽能通五經之義貫羣聖之言此
非通儒碩學未易言此三尺之童經文未誦先以爾雅
授之不啻嫁甫人門早言杵臼子氏猶在賄馬來歸不
亦慎乎大抵徒誦其文莫知其義而爾雅一書遂成閭
里書師課蒙本子亦枉矣乎且爾雅以訓詁爲文率以
一二字句強以連之氣已抑塞而不暢達以方萌之機
封之使錮如噎如吃不可以誦所謂長言永歎莫之有
也陽氣不宣虛靈漸鈍其帙雖終茫然罔覺欲其通經
書善屬文吾知難矣竊謂教童子者宜瀹其性靈導其
善志養其和氣蓄其道德不速其成不誘以利不飾以

虛果有出人之才不必讀爾雅爾雅自能爲之用世之通儒非從幼年讀爾雅來也若謂近年考試之文間有以用爾雅字句獲者緣是而爲教則非余所知矣

請立北湖耆舊祠狀

辛酉科舉人焦循爲留存舊蹟呈明存案事竊縣治北湖黃珏橋鎮市中有舊屋一所係前明忠臣梁公于渙之宅梁賣與謝公承貴今謝姓後人因屋久圯壞將售於人謝係循母黨至戚不忍以前賢舊蹟母家遺屋一旦拆毀汗穢於屠酤之手勉力歸謝之價契買投稅在案竊以梁公之忠昭於明史已 恩旨入祀忠義祠謝

公父子之孝義亦載於邑志循願已力修葺卽立梁公
牌位奉祀於內以謝公祔之其里中孝弟忠信行誼載
於史志者俟更爲斟酌入祀名爲北湖耆舊祠不招僧
道不雜祀他神但循所契買他姓不得爭占循之子孫
亦不得擅賣於人爲此將史志所載梁公謝公事實錄
呈臺下賞示存案俾忠孝舊宅不致就湮或亦於風俗
人心不無裨嘉慶二十一年正月二十三日

雕菰集卷十二終